

**Bajet alternatif: Pakatan tawar gaji minimum RM1,100**  
**The Malaysian Insider**  
**04 Oktober , 2011**  
**Oleh G Manimaran**

KUALA LUMPUR, 4 Okt — Sementara pentadbiran Najib sedang membincangkan kadar gaji minimum untuk dilaksanakan akhir tahun ini, Pakatan Rakyat hari ini menawarkan RM1,100 sebagai gaji minimum tenaga kerja negara ini.

“Gaji minimum akan diperkenalkan dan dikuatkuasakan. Pakatan Rakyat akan menggunakan mekanisme penetapan gaji yang terbukti berkesan di negara-negara lain dengan meminda semua akta sedia ada. Gaji minimum sebanyak RM1,100 akan disyorkan untuk diangkat dan dikuatkuasakan,” kata Pakatan Rakyat yang mengumumkan bajet alternatif 2012 hari ini.

Pakatan Rakyat juga menegaskan kemelut tuntutan gaji minimum yang berpanjangan dan tidak berkesudahan melambangkan persepsi pemerintah yang memandang rendah kepada rakyat, seolah-olah rakyat menagih dan meminta sedekah.

“Kuasa untuk menentukan gaji minimum terus dipusatkan di tangan menteri, justeru Akta Majlis Rundingan Gaji Kebangsaan yang dibentangkan baru-baru ini tidak lebih dari helah untuk menutup keengganan Barisan Nasional melaksanakan gaji minimum,” katanya lagi.

Pakatan Rakyat mengumumkan belanjawan mereka sementara kerajaan Barisan Nasional akan berbuat demikian Jumaat ini.

Pakatan Rakyat berkata pengenalan gaji minimum dijangka akan memanfaatkan 300,000 orang kakitangan awam yang berada di bawah RM1,100.

Selain itu katanya, tangga gaji kakitangan awam akan diselaraskan berikutan pengenalan gaji minimum dan melibatkan kenaikan gaji kakitangan awam yang lain mengikut tangga gaji masing-masing.

Baru-baru ini Kongres Kesatuan Sekerja Malaysia (MTUC) mengesyorkan gaji minimum RM1,500 sebulan.

Kementerian Sumber Manusia mengumumkan pelantikan anggota Majlis Perundingan Gaji Negara minggu lalu.

Seiring dengan pengumuman itu, Pakatan Rakyat juga mengumumkan bahawa ia akan melaksanakan pembayaran elaun pendidik sebanyak RM500 sebulan bagi setiap orang guru seperti yang dijanjikan di dalam Buku Jingga.

“Penyelarasan gaji kakitangan awam berikutan pengenalan gaji minimum dan janji Buku Jingga akan melibatkan peruntukan tahunan sebanyak RM5.9 bilion.

“Pakatan Rakyat akan menghentikan serta-merta kecenderungan dan amalan menggunakan pakai tenaga perunding dalam proses keputusan kerajaan seperti amalan sekarang dan mengembalikan pengaruh dan kedudukan kakitangan awam dalam proses kerajaan,”

katanya lagi.

The Malaysian Insider

Hakcipta © 2011 The Malaysian Insider

Source: <http://www.themalaysianinsider.com/bahasa/article/bajet-alternatif-pakatan-tawar-gaji-minimum-rm1100/>